

## FORUM

# Zatgei dil pli bi ch'ei dat

«Cantar ei zatgei dil pli bi ch'ei dat», ha *Ewald Vinzens* da Ruschein manegiau, cura che jeu hai dumandau el tgei che seigi sia motivaziun da cantar en in chor, e quei gia dapi biars biars onns. Buc en in chor, mobein en dus chors conta el cun siu bi bass. Dapi varga 50 onns el chor viril Ligia Grischa e dapi l'entschatta el chor mischedau da Ruschein, en quei chor dil vitg ch'ei «naschius» avon 45 onns ord igl anteriur chor viril.

### Ils giuven

Il chor mischedau da Ruschein ei el center dalla proxima sera «da cuminonza a Ruschein – la sera dils treis». Ei dat buc ina sera da cant cul chor, mobein ina sera che tematisescha la muntada d'in tal chor per la cultura e la cuminonza dil vitg. Era *Ursula Capaul-Mirer* vegn a raquintar quella sera da sia motivaziun da star tons onns fideivla al chor mischedau. Ella ei ussa cantadura, mo ella ha era dirigiu quei chor ina roscha onns. La dirigenta actuala ei *Patricia Cadruvi* che ha recaltgau cun quei chor in «fetz bien» alla fiasta da cant districtuala a Trun il zercladur uonn. Sia feglia da 14 onns conta dil reminent era gia el chor ed ei leu la pli giuvna cantadura. Ed il cantadur il pli giuven, *Dante Cola*, lez ha 17



**Il chor mischedau Ruschein a Trun ils 15 da zercladur 2024.**

FOTO RTR

onns e vegn a raquintar tgei che motivescha el da far part d'in tal chor dil vitg, el ch'ei gimnasiast e suna clavazin e gitarra ed era «in tec orgla», sco quei ch'el gi.

In tec cant dat ei tuttina d'udir quella sera. RTR ha mess a disposiziun a «da cuminonza» il video dalla producziun dil chor mischedau Ruschein uonn a Trun. In medley da biebein sis minutas. Ed alla fin dalla sera vegn offeriu

sco usitau in migiel aua ni vin. Beinvegnidas ein secapescha era persunas d'ordeifer.

*Maria Cadruvi*

**«Il chor mischedau da Ruschein – sia historia e sia muntada actuala per la cultura e la cuminonza dil vitg.» Margis, ils 3 da settember 2024, 20.15, Casa da scola Crestas, stanza 11, Ruschein. Entrada gratuita. Dapli mira [www.dacuminonza.ch](http://www.dacuminonza.ch)**